



2014KO IRAILAREN 25EKO
OHIKO OSOKO BILKURA

Lazkaoko Udaletxean, bi mila eta hamalauko irailaren hamalauan, iluntzeko zazpi eta erdietan, Lazkaoko Udal Osoa biltzen da, aurrez honetarako deialdia egin delarik, Aze-ari Andonegi Beristain Alkatearen lehendakaritzapean, ohiko batzaraldia egin asmoz.

Bertaratutako zinegotziak honako hauek dira: Kepa Goenaga Alikostes, Haizea Mendia Iztueta, Joseba Imanol Aran Barandiaran, Maialen Aldasoro Aranburu, Maria Aranzazu Bengoa Gorosabel, Urtzi Iruin Arruti, Patxi Albisu Estensoro, Ane Irastortza Izagirre, Inazio Estensoro Eskisabel, Milagros Madrazo Rada eta Juan Manuel Serna Portugal.

Aktan adieraziko da Felix Urkola Iriarte zinegotzia bertaratzen deneko unea.

Idazkari lanetan Iñaki Eskisabel Zurututzak dihardu.

I.- AURREKO AKTA.-

Alkateak bilkurari hasiera eman ondoren, bertaratutakoen onespenera aurkezten da 2014ko uztailaren 24an egindako bilkurako akta, idatzita dagoen moduan onartzen delarik.

II.- ALKATETZAREN EBAZPENEN BERRI EMATEA.-

Ondoren Alkateak azken Osoko Bilkuratik gaur arte emandako Alkatezaren Ebazpenen berri ematen du, ebazpen hauen zenbakizko laburpen baten bidez.

Osoko Bilkura jakinaren gainean gelditzen da.

III.- ALKATEEN AUKERAKETA ZUZENERAKO PROPOSAMENAREN AURREAN MOZIOA.-

Bilduk aurkeztutako mozioak honela dio:

"ALKATEEN AUKERAKETA ZUZENERAKO PROPOSAMENAREN AURREAN

MOZIOA

Herritarrengandik gertuena dauden instituzioak izanik, Udalen jarduera ireki, zabal eta demokratikoan sakontzea, eguneroko ariketa izan beharko litzateke. Hauteskundearen aurretik, egunean bertan eta ondoren ere, Udalek herritarren borondatearen ispilu izan behar dute. Aldi berean, gainerako interes partidista, ekonomiko eta finantzieroren gainetik, herritarrenganako zerbitzua eta konpromisoa izango dira etengabe, Udal politika ezaugarrituko duten adierazleak.

Baina gure Udalek aurrekinik gabeko erasoak jaso izan dituzte azken urteetan. Europatik proposatu eta Madriletik inposatu dituzten murrizketen gauzapearen bidez, ahalmen politikoak eta ekonomikoak erabat mugatu zaizkie Udalei, lehendik larria zen egoera, orain-



dik ere larriago bilakatuz. Madriletik inposatu nahi izan zaizkigun neurri horiek guztiek, udalen autonomia suntsitzeaz gain, Udalen eskuetan dauden baliabideak esku pribatueta-
ra bideratzeko ate guztiak irekitzen saiatu dira. Eremu publikoa eta herritarra ahulduz eta
era berean eremu pribatuan mugitzen diren enpresak indartuz. Azken urteetako udalen
jarduera eredu, berez ahula izanik ere, errotik okerrera aldatu nahi izan da Madrilgo Go-
bernutik.

Behin eta berriz, Hego Euskal Herriko instituzio guztiek, udalen autonomia indartzearen
beharra eta udalak herritarrengana gerturatzeko neurriak aldarrikatu arren, Madriletik en-
tzungor egin zaigu eta inposaketarekin erantzun zaigu.

Azken urte hauetan neurri hauek bultzatu eta udalen eskumen politikoak murriztu dituen
PP alderdia, alkatearen aukeraketa zuzenerako proposamen batekin datorkigu. Oraindik
osotasunean ezagutzen ez baldin bada ere, alkatea zuzenean zerrendarik bozkatueneko
zerrendaburu izendatzeko proposamena jarri da mahaiaren gainean. Udal hauteskundera-
tarako hilabete gutxi falta diren honetan, nagusiki PP-ren alderdi interesei erantzuten dien
proposamen baten aurrean gaude. PP-k ohikoa duen bezala eta beste behin ere, inoren
iritziari kasurik egin gabe (eta bereziki Euskal Herriko udal eta toki erakundeetatik egiten
diren aldarrikapenei kasurik egin gabe) ari da urratsak ematen. Bere interes politiko alder-
dikoi eta zentralistak inposatu nahi ditu gure udaletan, herritarren gehiengoaren iritzia al-
de batera utzita. Alkatetza eta Udal Gobernuak, herritarren gehiengoaren borondatea or-
dezkatu behar dute. Alkatearen erreferentzia garrantzitsua da, baina ez eredu presiden-
zialista baten arduradun gisa, herritarren gehiengoaren ordezkari gisa baizik.

Hauteskunde Legearen aldaketa sakon bat behar dela uste dugu. Baina ez alderdi bataren
edo bestearen interesak defendatzeko, baizik eta Euskal Herritarrok gure udal eta institu-
zio egitura nolakoa izan behar duen erabakitzeko aukera izateko. Gure udaletan demokra-
ziari ateak irekitzeko, jarrera presidentzialista eta autoritarioak alde batetara uzteko eta
herritarren hitzak udaletan zuzenean indarra izan dezan. PP-k aurkeztu duen proposame-
naren kontrako norabidean egin behar dira aldaketak.

Hau guztia kontuan izanik, LAZKAOko Udalak, honako puntu hauek onartzen ditu:

- 1.- Udal honek, Madrilgo Gobernutik PP-k alkatea zuzenean zerrendarik bozkaturiko ze-
rrendaburua izendatzeko burutu nahi duen Lege Aldaketaren aurkako jarrera adieraz-
ten du. Udal eta herritarren interesen gaineratik, PP-ren alderdi interesei erantzuten die-
lako. Norabide horretan, udal honek, interes alderdikoiek sustaturiko Hauteskunde Le-
gearen edozein aldebakarreko aldaketa errefusatzeko du.
- 2.- Udal honek, Euskal Herriko udal eta toki entitateen borondatea errespetatu eta gure
egitura instituzionala inposaketa eta murrizketarik gabe, Euskal Herritarren beharren
arabera antolatze eskubidea aldarrikatu nahi du.
- 3.- Udal honek, bere jardueran herritarren parte-hartzea eta demokrazia zuzenerako tres-
nak martxan jartzeko konpromisoa hartzen du, udalaren osaketan ez-ezik udaleko era-
baki garrantzitsuenen aurrean ere.
- 4.- Udal honek, ebazpen honen berri, herritarrei eta Madrilgo Gobernuari emateko eraba-
kia hartzen du.



**Euskal Herrian, 2014ko irailean.
EH BILDU"**

Estensoro zinegotziak (EAJ) esaten du mozioaren alde bozkatuko dutela.

Serna zinegotziak (PSE-EE) ere esaten mozioaren alde bozkatuko duela.

Gaia bozketan jarri eta osoko bilkurak, bertaratutako guztien aldeko botuekin, mozia onartu egiten du.

IV.- KUTXAREN INGURUKO MOZIOA.-

Alkateak esaten du gai honen inguruan bi dokumentu aurkeztu direla: bat Bilduk aurkeztutako mozia eta bestea EAJk aurkeztutako mozio edo enmendakina, eta biak aztertuko direla.

Bilduk aurkeztutako mozioak honela dio:

"Lazkaoko Udal Batzari

Ia 150 urte inguru pasatu dira Donostiako (Bilbo, Gasteiz, ...) Udalak eta Gipuzkoako (Ara-
ba, Bizkaia, ...) Aldundiak Caja de Ahorros de San Sebastián eta Caja de Ahorros de Gi-
puzkoa sortu zituztenetik. Zalantzarik ez dago, eta historiari errepaso txiki bat ematea na-
hikoa litzateke, kutxa horiek sortu zirenean, hasieratik, funtzio publiko eta sozial bat bete-
tzeko sortu zirela.

Funtsean honokoa zen aipaturiko helburu eta funtzio publiko eta soziala: bertako herritar-
ren aurrezkiak, bertan inbertituak izateko apustua bermatzea. Horretarako, herritarrei eta
familiei finantza-zerbitzua eskaini, bertako enpresari txikiei finantziarioa bermatu, udalen
finantziario eta inbertsioetan lagundu, bertako ekonomiarentzat estrategikoak izan daitez-
keen proiektuak bultzatu eta hori gutxi balitz, lortutako etekinak gizarte-ekintzan inberti-
tzea izan dute kutxek urteetan helburu.

Une honetan ordea, erraz esan dezakegu kutxen bategiteak sortu den Kutxabanken ildoak
ez dela bertako herritarrei eta ekonomiari begirako funtzio publiko eta soziala betetzen
ari. Aitzitik, negozio hutsa eta bidegabea da besterik gabe bultzatzen ari dena. Hori gutxi
balitz, kutxak banku-fundazio bihurtzeko hautuarekin, kontrol publiko eta soziala murriztu-
ko da eta jada iragarri den pribatizazioaren bideari ateak ireki dakizkioke, aipaturiko fun-
tzio publiko eta sozial hori behin betirako desagerraraziz.

Historikoki bete duten funtzioagatik, zein egungo egoera ekonomiko zailean bete beharko
luketen funtzioagatik, garrantzitsua da oso bestelako norabidean doan bide berri bati eki-
tea eta hortxe kokatzen ditugu hain zuzen Gipuzkoako Foru Aldundiak aurkeztu duen pro-
posamenaren helburuak. Horrexe diote hitzez hitz:

1. "Gipuzkoako Foru Aldundiak, Kutxaren izaera publiko eta soziala bermatzea du lehen helburu.



2. Gipuzkoako Foru Aldundiak, izaera publiko eta sozial horren bidez, entitate fundatzaileek hasieratik finkatutako helburuak berreskuratu nahi ditu XXI. mendeko Euskal Herriara egokitutako Kutxabank eta kutxen izaera eta helburuak bermatuz.
3. Bizi dugun krisi ekonomiko latz honetatik ateratzeko eta Gipuzkoa eta Euskal Herri Berria eraikitzeko finantza-tresna publiko eta soziala izatea.
4. Bertako ekonomia errealean mesedetan arituko den finantza-entitatea izatea eta herri zein eskualdeetako errealitate sozialarekin eta ekonomikoekin lotuta egotea, izan daitezkeen behar ekonomiko eta sozialen aldeko inbertsioak eginez:
 - Bertako autonomoei, merkatariei, enpresari txikiei eta kooperatibistei finantzazioa bermatzea.
 - Udalei aurreikusi ditzaketen inbertsioei begira, finantza-baliabideak eskaintzea.
 - Kutxen sorreran egon zen langileekiko eta familiekiko begirunea berreskuratzea eta etxe-kaleratzeak edota IRPH bezalako jarduerekin amaitzea eta familiek dituzten finantza beharretarako eskaintza eraginkor eta justua eskaintzea.
 - Oro har, herriz herri hedatua egongo den finantza entitatea izatea. kalitatezko zerbitzua eskaintzeko etengabeko konpromisoa izango duena, bai langile kopuru eta bitartekoen ikuspuntutik zein zerbitzuaren kalitate edota euskararen erabilpenarengatik ere.
 - Sorreratik hain garrantzitsua izan den gizarte-ekintzarekiko konpromisoak berrestea eta betetzea eta gizarte-ekintzak XXI. mendean bete behar duen papera denon artean berraztertzea eta garatzea."

Kutxa banku-fundazio batean ez bihurtzeko (Bizkaia eta Araban, banku-fundazio izateari uzteko) eta aipatu helburu horien norabidean arituko diren kutxak eta Kutxabanken finantza-ildo eraberritu bat bermatzeko, Gipuzkoako Foru Aldundiak akzioen eskualdatze-prozesu bat proposatu du, hain zuzen ere, izaera publiko eta soziala ahalbideratzen duen aukera erreal, legal eta eraginkor gisa.

Hori guztia kontutan hartuta Lazkaoko Udalak honako erabakiak hartzen ditu:

- 1.- Lazkaoko Udalak herritarren, familien eta bertako ekonomiaren mesedetan arituko den Kutxabanken finantza-ildo eraberritu bat aldarrikatu nahi du.
- 2.- Lazkaoko Udalak Kutxaren (GIPUZKOAN) eta Kutxabanken izaera publiko eta soziala bermatzeko beharrezkoak diren neurri eta erabakiak hartzeko borondate eta prestutasun irmoa du.
- 3.- Norabide horretan, Lazkaoko Udalak (GIPUZKOAN) batzarrari eskatzen dio Gipuzkoako Foru Aldundiak proposatu duen eskualdatze-prozesu hori martxan jar dezala, Gipuzkoako Kutxa banku-fundazioa bihurtu ez dadin eta herritarren eta bertako instituzioen izaera publiko eta soziala bermatzen jarraitu ahal izateko."

Mozio honen irakurketa egiten ari zen bitartean Felix Urkola zinegotzia bertaratu da.

Ondoren EAJk aurkeztutako enmendakina irakurtzen da. Enmendakinak honela dio:



"EMENDAKINA:

- 1.- Udalbatzak bere aitortza erakusten du ehun urte baino gehiagoko historian zehar Kutxak egindako lanagatik, bere gizarte lanagatik, bere finantza jardueragatik eta gure Lurraldearen garapen ekonomiko eta sozialean izandako inplikazioagatik, finantza eragile nagusi moduan.
- 2.- Udalbatza, Espainiako finantza sisteman gertatzen ari den berregituratzearen aurrean, Kutxa banku fundazio bihurtzearen alde agertzen da, aurrezki kutxa eta banku fundazioei buruzko 26/2013 Legea betetzeko, eta, alde horretatik, gobernu organoei eskatzen die beharrezko izapideei ekitea, bihurtze hori Legeak xedaturiko epe eta terminoen arabera gertatzeko.
- 3.- Udalbatzak Eusko Jaurlaritzari eskatzen dio aurrezki kutxei eta banku fundazioei buruzko 26/2013 Legeak ezarritakoa betez, aurrezki kutxei buruzko euskal legedia egoki dezala eta banku fundazioei buruzko lege propioa gara dezala, legegintzako izapidezak ahalbidetzen duen ahalik eta azkarren eta, nolahi ere, ekitaldi honetan.
- 4.- Udalbatzak, Kutxaren gizarte jardueraren etorkizuna defendatzen du, bai eta Lurraldearen garapen ekonomiko eta sozialarekiko duen konpromisoaren jarraipena, Kutxako edo banku Fundazioko gobernu organoetan izango duen ordezkartzaren bidez, eta Foru Aldundiari hertsatuki eskatzen dio gauza bera egin dezala.
- 5.- Udalbatzak Kutxako gobernu organoei eskatzen die aurrezki kutxa banku fundazio bihurtzeko prozesuan gardentasunez jokatzeko, indarrean dagoen legedia estu betez eta banku fundazioaren patronatuan Gipuzkoako gizartearen gehiengo eta aniztasuna errespetuz ordezkaturata egoteko hastapenarekin bat.
- 6.- Udalbatzak adierazten du Kutxaren eginkizunak etorkizunean ere izan behar duela duen ondarea kudeatzea lurralderekiko konpromisoa irizpide erabilia, ekonomi eta gizarte garapena sustatuz, aipatu ondarearen etekinak Gizarte Ekintzara bideratuta, lehen tasuntzat izanik aipatu ondarea babestu eta handitzea, eta lurralderekiko konpromisoaren erakusgarri, Kutxabanken kontrola Euskadin egoten laguntzen duela."

Estensoro zinegotziak (EAJ) esaten du beraiek aurkeztu dutenaren alde bozkatuko dutela. Esaten du baita ere lege hau kutxa eta banketxeen europako lege eta arauen arabera egindakoa dela baina bestalde baita ere, EAJ, PP eta PSE-EE saiatzen ari direla fundaziotik dauken espiritu hori mantendu dezan eta ekintza soziala eta ekonomiko soziala mantentzen jarraitu dezan.

Serna zinegotziak (PSE-EE) esaten du Bilduren mozioak lehengoaren antza duela iruditzen zaiola, hau proposamen erabat partidista eta errealitatetik at dagoena dela, eta mozio honen aurka bozkatuko duela. EAJren enmendakinaren aurrean, esaten du alde bozkatuko duela.

Alkateak (Bildu) esaten du proposamen honen helburua Kutxak urte guzti hauetan mantendu izan duen kontrol publikoarekin jarraitzea dela bertako ekonomiaren eta garapenaren mesedetan eta esku pribatuetan gera dadin ekiditea.



Guzti honen ondoren bozketan jartzen dira bi mozioak.

Lehenengo Bilduk aurkeztutako mozioa, eta aldeko 7 botu (Bildu) eta aurkako 6 botuz (EAJ, PSE-EE) mozioa onartu egiten da.

Ondoren EAJren mozioa, eta aldeko 6 botu (EAJ, PSE-EE) eta aurkako 7 botuz (Bildu) mozioa baztertu egiten da.

V.- BILERAREN AMAIERA.-

Eta eztabaidatzeko beste gairik ez dagoenez, Alkateak bilera amaitutzat jotzen du, iluntzeko zortziak eta hamarrean direnean nik, Idazkariak, guztiaren akta jaso eta ziurtatzen dudalarik.



A handwritten signature in blue ink, consisting of a stylized 'A' followed by a horizontal line and a loop.

